



*Sabtu, 04 Februari 2023*

**Ogen : Hosea 6:1-6**



**Keleng Ate Si Pedas Lesap**



**R**emang ras namur erpagi-pagi lesap erkiteken wari reh siangna, embun simekapal pe lesap erkiteken las matawari. Lesap, la ertahan, minter mobah. Bagenda me keleng ate bangsa Israel si igejapken Dibata. Bas paksa ia ngalaken sada pinakit si mekelek, mindo ia man Dibata segelah pinakit e pe madan. Kenca madan pinakit e la ndekahsa minter ka me ia nilah i bas Dibata nari. Igejapkenna kai si jadi i bas geluhna erkiteken lagu langkahna si la patuh man Dibata, e maka mulih ia kempak Dibata nina i bas ukurna uga pe ipepalemNa kita, ilukaiNa kita, ibalutiNa ka nge lukata e. Bagenda me rusur perbahanen kalak Israel enda. Itutungna persembahenna, iendeskena man Dibata kenca si e ngegah ka erbahan si jahat. Kentisik jera, kenca si e mulihken ka erbahan dosa. Enda me ciri-ciri kalak si labo setia. Kekelengenna situasional, entah la ertahan ndekah, minter lesap, bene ras sidebanna. Si e kerina ieteh Dibata kap.

Nina Dibata "sikuarapken e me kap kekelengen si tetap." Kekelengen si tetap e ulin asangken persembahen-persembahen. Kekelengen si la mobah, jadi palas i bas mbangun hubungan si paguh sada ras sidebanna. Bas kekelengen e lit gegeh, lit kininggiten erkorban nandangi si ikelengi. Arah si enda mari sirenungken uga sedekah enda kekelengenta man Dibata? sungsung denga entah enggo reh bagesna reh dekahna. I bas pusuh si mbagesna nari gejapkenlah kekelengen Dibata si la pernah mobah man banta, e lah sinjemba kita tetap ncidahkan kekelengen man bana, alu la mesunah mobah bas IA nari. Dibatanta e labo Dibata situasional tapi IA me Alpa ras Omega.

*☞ Setia...setia...ras teruslah setia man Dibata saja*